

## BERTSO BERRIAK

Miren Amuriza

### Sagutxo batzuekin



#### I

Gabonak oporrekin  
lotu ohi ziren lehen,  
orain ikasleontzat  
ez da hala zeren  
azterketa garaia  
hor baita ondoren,  
liburuak astintzen  
eroki han-hemen  
ba al dakigu gero  
ikastea zer den?

#### III

Jakintsu izatea da  
askoren helburu,  
hori lortzeko berriz  
daude mila modu.  
Hitzen handitasunak  
xarmatzen gaitu gu,  
baina funtsezko gauzak  
ez lan ez liburu  
geu konturatu gabe  
ikasten ditugu.

#### V

Azterketa sasoiko  
nahaste-borrastea,  
apunteak pilatu  
eta irenstea.  
Bata buruz ikasi  
txukundu bestea  
ondoren dena ahaztu  
bai patu tristea!  
Horri deitzen al zaio  
ondo ikastea?

#### II

Oinez ikastea da  
ikasgai lehena,  
gero hitz egin edo  
idatzi hurrena.  
Tresna bat jotzea ere  
a zer zoramena!  
Baina dena da lan bat  
denboran barrena  
pazientzia handiz  
egin behar dena.

#### IV

Dakien horri entzun  
hari galde gero  
norbere esperientzia  
ere hortxe bego.  
Jakinmina guztion  
gogoan balego,  
eskola gabe ere  
ia egunero  
ikasiko genuke  
nahi izan ezkeru.

#### VI

Ezintasun handia  
sortzen da batengan  
erantzunik ez bada  
aurkitzen galderan.  
Nahiz eta ez argitu  
ikastea zer dan,  
zer ikasia beti  
daukagu aukeran;  
jakinduria inoiz  
ez dago soberan.



DOINUA: Haurtxo polit bat



Bidali zure sortak [bertsoak@argia.com](mailto:bertsoak@argia.com) helbidera. Aukeratuak orri honetan argitaratuko ditugu.